

藏書

(明) 李贄 著

(明)李 贄著

藏書

第二冊

中華書局

藏書卷十三名臣傳

一 經世名臣

魏相

魏相字弱翁。濟陰定陶人也。舉賢良。以對策高第爲茂陵令。頃之。御史大夫桑弘羊客詐稱御史止傳。丞不以時謁。客怒。縛丞相。疑其有奸。收捕客。按致其罪。論棄市。後遷河南太守。禁止奸邪。豪強畏服。會丞相車千秋死。先是千秋子爲洛陽武庫令。自見失父而相治甚嚴。恐久獲罪。乃自免去。相獨恨曰。大將軍聞此令去官。必以爲我用丞相死不能遇其子。使當世貴人非我。殆矣。武庫令西至長安。大將軍霍光果以責過相。曰。幼主新立。以爲函谷京師之固。武庫精兵所聚。故以丞相弟爲關東尉。子爲武庫令。今河南太守不深惟國家大策。苟見丞相不在。而斥逐其子。何淺薄也。後人有告相賊殺不辜。事下有司。河南卒戍中都官者二三千人。遮大將軍自言。願復留作一年。以贖太守罪。河南老弱萬餘人守關。欲入上書。關吏以聞。大將軍用武庫令事。遂下相廷尉獄。久繫。踰冬。會赦出。復有詔守茂陵令。遷揚州刺史。考按郡國守相多所貶退。相與丙吉相善。時吉爲光祿大夫。予相書曰。朝廷已深知弱翁治行。方且大用矣。願少慎事自重。藏器於身。相心善其言。爲霽威嚴。居部二歲。徵爲諫議大夫。復爲河南太守。數年宣帝卽位。徵相入爲大司農。遷御史大夫。四歲大將軍霍光薨。上思其功德。以其子禹爲右將軍。兄子樂平侯山復領尙書事。相因平恩侯許伯奏封事。言春秋譏世卿。惡宋三世爲大夫。及魯季孫之專權。皆危亂國家。今光死。子復爲大將軍。兄子秉樞機。昆弟諸壻據權勢。任兵官。光夫人顯及諸女皆通籍長信宮。或夜詔

門出入。驕奢放縱。恐寢不制。宜有以損奪其權。破散陰謀。以固萬世之基。全功臣之世。又故事諸上書者。皆爲二封。署其一曰副。領尙書者。先發副封。所言不善。屏去不奏。相復因許伯白去副封。以防壅蔽。宣帝善之。詔相給事中。皆從其議。霍氏殺許后之謀。始得上聞。乃罷其三侯令就第。親屬皆出補吏。於是韋賢以老病免。相遂代爲丞相。封高平侯。食邑八百戶。及霍氏怨相。又憚之。謀矯太后詔。先召斬丞相。然後廢天子事。發覺。伏誅。宣帝始親萬機。勵精爲治。練羣臣。核名實。而相總領衆職。甚稱上意。相明易經。有師法。好觀漢故事。是及便宜章奏。以爲古今異制。方今務在奉行故事而已。數條漢興已來。國家便宜行事。及賢臣賈誼。鼂錯。董仲舒等所言。奏請施行之上。皆納用焉。相救掾史案事郡國。及休告。從家還至府。輒白四方異聞。或有逆賊風雨災變。郡不上。相輒奏言之。時丙吉爲御史大夫。同心輔政。上皆重之。視事九歲。神爵三年薨。諡曰憲侯。

江統

江統。字應元。陳留人也。靜默有遠志。時人爲之語曰。巖然稀言江應元。除山陰令。時關隴屢爲氐羌所擾。統深惟四夷亂華。宜杜其萌。乃作徙戎論。其辭曰。夫夷蠻戎狄。謂之四夷。四夷之中。戎狄爲甚。弱則畏服。強則侵叛。故匈奴求守邊塞。而侯應陳其不可。單于屈膝未央。而望之議以不臣。是以有道之君。牧夷狄也。惟以待之有備。禦之有常。雖稽顙執贄。而邊城不弛固守。雖寇賊侵暴。而兵甲不加遠征。期令境內獲安。疆場不侵而已。及至周室失統。諸侯專征。戎狄乘間。得入中國。或招誘安撫。以爲己用。故申繒之禍。顛覆宗室。襄公要秦。遽興姜戎。當春秋時。義渠大荔。居秦晉之域。陸渾陰戎。處伊洛之間。鄭瞞之屬。害及濟東。侵入齊宋。陵虐邢衛。齊桓攘之。存亡繼絕。北伐山戎。以開燕路。故仲尼稱管仲之力。嘉左衽之功。逮至戰國。楚吞蠻氏。晉翦陸渾。趙武胡服。開榆中之地。秦雄咸陽。滅義渠之等。始皇并天下。南兼百越。北走匈奴。當是時。中國無復四夷也。漢興。西都長安。及至王莽之敗。西

都荒毀。建武中。以馬援領隴西太守討叛羌。徙其餘種於關中。居馮翊河東空地。與華人雜處。數歲之後。族類蕃息。恃其肥強。又苦漢人侵之。永初之元。騎都尉王弘使西域。發調羌氏以爲行衛。於是羣羌奔駭。互相扇動。二州之戎。一時俱發。覆沒將守。屠破城邑。鄧騭之征。輿尸喪師。諸戎遂熾。至於南入蜀漢。東掠趙魏。唐突軹關。侵及河內。及遣北中軍候朱寵將五營士。於孟津距羌。十年之中。夷夏俱斃。任尙馬賢僅乃克之。此所以爲害深重。累年不定者。雖由禦之無方。將非其才。亦豈不以寇發心腹。害起肘腋。疾篤難療。瘡大遲愈之故哉。自此之後。餘燼不盡。小有際會。輒復侵叛。馬賢狃汰。終於覆敗。段熲臨衝。自西徂東。雍州之戎。常爲國患。漢末關中殘滅。魏興與蜀分隔。疆場之戎。一彼一此。魏武帝令將軍夏侯妙才討叛氐阿貴千萬等。後因拔棄漢中。遂徙武都之種於秦川。欲以弱寇強國。扞禦蜀虜。此蓋權宜之計。一時之勢。非萬世之利也。今者當之。已受其弊矣。夫關中土沃物豐。厥田上上。加以涇渭之流。溉其烏鹵。鄭國白渠。灌浸相通。黍稷之饒。畝號一鍾。百姓謠詠其殷實。未聞戎狄宜在此土也。夫戎狄志態。不與華同。而因其衰弊。遷之畿服。士庶玩習。侮其輕弱。使其怨恨之氣。毒於骨髓。至於蕃育衆盛。則坐生其心。以貪悍之性。挾憤怒之情。候隙乘便。輒爲橫逆。而居封域之內。無障塞之隔。掩不備之人。收散野之積。故能爲禍滋蔓。暴害不測。此必然之勢。已驗之事也。當今之宜。宜及兵威方盛。衆事未罷。徙馮翊北地新平安定界內諸羌。著先零罕开析支之地。徙扶風始平京兆之氐。出還隴右。著陰平武都之界。廩其道路之糧。令足自致。各附本種。及其舊土。使屬國撫夷就安集之。戎晉不雜。並得其所。上合往古卽敍之義。下爲盛世永久之規。縱有猾夏之心。風塵之警。則絕遠中國。隔越山河。雖有寇暴。所害不廣。是以充國子明能以數萬之衆。制羣羌之命。有征無戰。全軍獨尅也。難者曰。方今關中之禍。暴兵二載。征戍之勞。師老十萬。凶逆旣戮。悔惡初附。百姓望寧息之期。若枯旱之思雨。而子方欲作役起徒。使疲瘁之衆。徙自猜之寇。以無穀之人。遷乏食之虜。恐羌戎離散。心不可一。前害未及弭。而後變復橫出矣。答曰。羌戎狡猾。擅相號署。攻城野戰。傷害牧守。連兵聚衆。載離寒暑矣。而

今異類瓦解。同種土崩。老幼繫虜。丁壯降散。禽離獸迸。不能相一者。子以此等爲尙挾餘資。悔惡反善。懷我德惠而來柔附乎。將勢窮道盡。智力俱困。懼我兵誅。以至於此也。曰。無有餘力。勢窮道盡故也。然則我能制其短長之命。而令其進退由己矣。夫樂其業者不易事。安其居者無遷志。方其自疑危懼。畏怖促遽。故可制以兵威。使之左右無違也。迨其死亡散離。與關中人戶爲讐。故可遐遷遠處。令其心不懷土也。且關中之人。百餘萬口。率其少多。戎狄居半。處之與遷。必須口實。若有窮乏。糝粒不繼。故當傾關中之穀。以全其生。今我遷之。傳食而至。附其種族。自使相瞻。而秦地之人。得其半穀。此爲濟行者以廩糧。遺居者以積倉。寬關中之逼。去盜賊之原。除旦夕之損。建終年之益。若憚豐舉之小勞。而忘永逸之弘策。惜日月之煩苦。而遺累世之寇敵。非所謂開物成務。創業垂統。崇基拓迹。謀及子孫者也。時不能用。未及十年。而夷狄亂華。中原不守。可勝恨哉。

馬周

馬周。字賓王。博州茌平人也。天資曠邁。鄉人以其不謹細薄之。武德中。補州助教。不治事。刺史達奚恕數加譴讓。周乃去客密州。趙仁本高其才。給使入關。周留客汴。爲浚儀令崔賢所辱。乃遂感激而西去。舍新豐逆旅。主人又不之顧。周命取酒一斗八升。獨酌而醉。至長安。舍中郎將常何家。時貞觀五年也。方詔百官極言得失。何武人不學。周因爲條二十餘事。太宗怪而問之。何曰。此非臣所能。家客馬周教臣言也。帝即令召客。未至。遣使者四輩趨促。及謁見。與語大悅。真愛才詔立門下省。明年拜監察御史。奉使稱職。帝以何得人。賜帛三百疋。周上疏。其略曰。臣伏見詔書。宗室功臣。悉就藩國。貽厥子孫。世守其政。臣謂宗室功臣。宜思所以安存之。富貴之。不必世官也。堯舜之父。有朱均之子。設有不肖。襲封嗣職。正欲絕之。則子文之治猶在。正欲存之。則欒黶之惡已暴。與其毒害於見存之人。寧割恩於已亡之臣。則向所謂愛之重之者。適所以傷之也。臣謂宜賦以茅土。囑以戶邑。必有材行。乃

隨器而授。漢光武不任功臣以吏事。所以終全其身者。良以此也。帝善其言。除侍御史。又言往貞觀初。率土荒儉。匹絹纔易斗米。而天下帖然者。百姓知陛下憂憐之。故人人自安。無謗讟也。五六年來。頻歲豐稔。匹絹至易粟十餘斛。而百姓咸怨。以爲陛下不憂憐之。何者。營爲者多不急之務也。夫儉以息人。貞觀初。陛下已躬爲之。今行之不難也。里語曰。貧不學儉。富不學奢。言其自然也。疏奏。帝稱善。擢中書舍人。周善敷奏。機辯明銳。帝每曰。我豈不見周卽思之。侍中岑文本曰。馬君論事。會文切理。聽之纔纔。令人忘倦。然鳶肩火色。騰上必速。恐不能久。十八年。遷中書令。二十二年卒。年四十八。贈幽州都督。初。帝遇周厚。周頗自負。爲御史時。遣人以圖購宅。衆以其與書生素無貲。皆竊笑之。他日。白有佳宅。直二百萬。周遽以聞。帝卽詔有司給直。眞君臣一體也併賜奴婢什物。子載。咸亨中。爲司列少常伯。與裴行儉分掌選事。故言吏部者。稱裴馬焉。

李德裕 官生

李德裕。字文饒。吉甫子。德裕卓犖有大節。不喜與諸生試有司。吉甫勉之。答曰。好驢馬。不入隊行。遂以蔭補校書郎。穆宗卽位。擢翰林學士。始吉甫相。憲宗牛僧孺。李宗閔對直言策。痛詆吉甫。吉甫泣訴於帝。有司皆得罪。遂與爲怨。吉甫又爲帝謀。討兩河叛將。李逢吉沮解其言。功未旣而吉甫卒。裴度實繼之。逢吉以議不合罷去。故追銜吉甫而怨度。擴德裕不得進。至是。間帝誅度。使與元稹相怨。奪其相位而已代之。欲引僧孺益樹黨。而牛李之憾結矣。僧孺亦爲上所厚。乃以僧孺同平章事。而出德裕爲浙西觀察使。敬宗立。修用無度。詔浙西上脂盞粧具。德裕奏比年旱災。物力未完。乃三月壬子赦令。常貢之外。悉罷進獻矣。今本道所存者。惟留使錢五十萬緡。率歲經費常少十三萬。軍用褊急。今所須脂盞粧具。度用銀二萬三千兩。金百三十兩。物非土產。雖力營索。尙恐不逮。願詔宰相議。何以俾臣不違詔旨。不乏軍興。不疲人。不斂怨。則前敕後詔。咸可遵承。妙人不報。又詔索盤繚繚綾千

正。德裕復奏言。太宗時。使至涼州。見名鷹。諷李大亮獻之。大亮諫止。賜詔嘉歎。玄宗時。使者抵江南。捕鵲鵲翠鳥。汴州刺史倪若水言之。即見褒納。皇甫詢織半臂。造琵琶捍撥。鏤牙箏於益州。蘇頲不奉詔。帝不加罪。夫鵲鵲鏤牙。微物也。二三臣尙以勞人損德爲言。豈二祖有臣如此。今獨無之。蓋有位者。蔽而不聞。非陛下拒不納也。妙人帝爲優詔停止焉。時帝數遊幸。狎比羣小。聽朝簡忽。德裕上丹宸六箴表。辭皆明直婉切。帝雖不能用。猶敕韋處厚作詔。厚答其意。德裕久留江介。心戀闕廷。因事寄情。望迴聖獎。然爲逢吉排竿。訖不內徙。在浙西八年。太和三年。召拜兵部侍郎。裴度薦德裕材堪宰相。而李宗閔以中人助先秉政。乃又出德裕爲鄭滑節度使。引僧孺協力。罷度政事。二怨相濟。凡德裕所善。悉逐之。於是二人權震天下。黨人牢不可破矣。踰年。徙劍南西川。蜀自南詔入寇。敗杜元穎。而郭釗代之。病不能事。民失職無聊。德裕至。完殘奮怯。皆有條次。始韋皋招來南詔。復嶺州。傾內資。結蠻好。示以戰陣文法。德裕以皋啓戎資益。其策非是。至元穎時。遇隙而發。故長驅深入。蹂躪千里。蕩無孑遺。今瘡夷尙新。非痛矯革。不能刷一方恥。乃建籌邊樓。按南道山川險要。與蠻相入者。圖之。左。西道與吐蕃接者。圖之。右。其部落衆寡。饋餉遠邇。曲折咸具。乃請甲人於安定。弓人於河中。弩人於浙西。繇是蜀之器械皆犀銳。率戶二百取一人。使習戰。貸勿事。緩則農。急則戰。謂之雄邊子弟。築仗義城。以制大度青溪關之阻。作禦侮城。以控榮經犄角勢。作柔遠城。以阨西山吐蕃。復邛峽關。徙嶺州治臺登。以奪蠻險。於是二邊寢懼。南詔還所俘掠四千人。吐蕃維州將悉怛謀。遂以城降。德裕請於朝。僧孺居中沮其功。曰。吐蕃之境。四面各萬里。失一維州。未能損其勢。比來修好。約罷戎兵。中國禦戎。守信爲上。彼若來責。曰。何事失信。養馬蔚茹川。上平涼阪。萬騎綴回中。怒氣直辭。不三日至咸陽橋。此時西南數千里外。得百維州。何所用之。徒棄誠信。有害無利。命返悉怛謀於虜。以信所盟。吐蕃盡誅之境上。德裕終身以爲恨。會監軍使王踐言入朝。盛言悉怛謀死。拒遠人向化。帝亦悔之。尤僧孺失策。僧孺內不自安。累表請罷。乃以僧孺充淮南節度使。而以李德裕爲兵部尙書。俄而宗閔罷。德裕代爲中書侍郎。又坐

論李訓、鄭注爲宗閔所譖。出爲鎮海觀察使。再貶袁州長史。德裕與宗閔既有黨。上甚患之。歎曰。去河北賊易。去朝中朋黨難。未幾宗閔以罪斥。而注、訓等敗。帝悟。乃以德裕爲太子賓客。分司東都。開成中。遷德裕淮南節度使。武宗立。召爲門下侍郎同平章事。初德裕父吉甫年五十一。出鎮淮南。五十四歲。自淮南復相。今德裕鎮淮南。復入相。一如父之年。當世榮之。旣入謝。卽進言治亂繫信任。引齊桓公問管仲所以害霸者。仲對琴瑟笙等。弋獵馳騁。非害霸者。惟知人不能舉。舉不能任。任而又雜以小人。害霸也。真切至到又追論維州事云。維州據高山絕頂。三面臨江。在戎虜平川之衝。是漢地入兵之路。初河隴盡沒。惟此獨存。吐蕃潛以婦人嫁此州門者。二十年後。兩男長成。竊開壘門。引兵夜入。遂爲所陷。號曰無憂城。從此得併力於西邊。更無虞於南路。憑陵近甸。旰食累朝。貞元中。韋皋欲經略河湟。須此城爲始。萬旅盡銳。急攻數年。雖擒論莽熱而還。城堅卒不可克。臣初到西蜀。外揚國威。中緝邊備。其維州熟臣信令。空壁來歸。臣始受其降。南蠻震懾。西山八國皆願內屬。其吐蕃合水、棲雞等城。旣失險阨。自須抽歸。可減八處鎮兵。坐收千里舊地。且維州未降前一年。吐蕃猶圍魯州。豈顧盟約。臣受降之初。指天爲誓。面許奏聞。各加酬賞。當時不與臣者。望風疾臣。詔臣執送。悉怛謀等。令彼自戮。臣累表陳論。乞垂矜捨。答詔嚴切。竟令執還。體備三木。輿於竹畚。及將就路。冤叫鳴嗚。將吏對臣。無不隕涕。其部送者。更爲蕃帥譏誚云。旣以降彼。何須送來。復以此降人。戮於漢境之上。恣行殘忍。用固藩離。至乃擲其嬰孩。承以槍槊。絕忠款之路。決兇虐之情。從古以來。未有此事。雖時更一紀。而運屬千年。乞追獎忠魂。各加褒贈。詔贈悉怛謀右衛將軍。是時已擊敗回鶻。未幾。澤潞劉從諫死。其從子稹擅留事。以邀節度。德裕請用兵討稹。稹伏誅。策功拜太尉。進封趙國公。德裕固讓。言唐與太尉惟七人。尙父子儀。乃不敢拜。裴度爲司徒。十年亦不遷。臣願守舊秩足矣。乃改封衛國公。韋弘質見德裕嚮用。因建言宰相不可兼治錢穀。德裕奏言管仲明於治國。其語曰。國之重器。莫重於令。令重君尊。君尊國安。治人之本。莫要於令。故曰。虧令者死。益令者死。不行令者死。留令者死。不從令者死。五者無赦。又曰。令在

上而論可否在下。是主威下繫於人也。傳曰。下輕其上。賤人圖柄。臣則國家搖動。而下人不靜。今弘質爲人所教而言。是圖柄臣者也。昔蕭望之。漢名儒。爲御史大夫。奏云。歲首日月光少。咎在臣等。宣帝以望之意。輕丞相。下有司詰問。貞觀中。監察御史陳師合上言。人之思慮有限。一人不可總數職。太宗曰。此欲離間我君臣。斥之嶺外。臣謂宰相有奸謀隱慝。則人人皆得上論。至於制置職業。人主之柄。非小人所得干也。時天下已平。德裕當國。凡六年。方用兵時。決策制勝。他相無與。故威名獨重於時。宣宗卽位。德裕奉冊太極殿。帝退謂左右曰。向行事近我者。非太尉邪。顧我毛髮爲森豎。翌日。罷爲荆南節度使。俄徙東都留守。白敏中。令狐綯。崔鉉。使黨人李咸。斥德裕陰事。又貶潮州司馬。明年。又導吳汝訥訟李紳殺吳湘事。貶爲崖州司戶參軍事。明年卒。年六十三。德裕既沒。見夢令狐綯曰。公幸哀我。使得歸葬。綯語其子瀉。瀉曰。執政皆其憾。可乎。既夕。又夢懼曰。衛公精爽可畏。不言禍將及。綯白帝。乃以喪還。白敏中。德裕所薦也。德裕明辯有風采。善爲文章。雖至高位。猶不去書。其謀議援古爲質。衰可喜。常以經綸天下自爲。武宗知而能任之。言從計行。是時王室幾中興。德裕所居安邑里第。有院號起草。有亭曰精思。每計大事。則處其中。雖左右侍御不得預。不喜飲酒。後房無聲色娛。嘗言。昔玄宗以臨淄王定內難。自是疑忌宗室。不令出閣。天下皆以爲幽閉骨肉。虧傷人倫。曷使天寶之末。建中之初。宗室散處方州。何至爲安祿山。朱泚所魚肉哉。初。德裕爲翰林學士。禮部侍郎。錢徽掌貢舉。西川節度使段文昌。翰林學士李紳。各以書屬所善進士於徽。及榜出。無之。及第者。鄭朗。朗之弟裴譔。度之子。蘇巢。宗閔之壻也。文昌言於上曰。今歲禮部不公。所進士皆子弟無藝。上以問諸學士。德裕。紳皆曰。誠如文昌言。上乃貶徽。江州刺史。宗閔。劍川刺史。或勸徽奏文昌。紳屬書。徽曰。苟無愧心。得喪一致。奈何。奏人私書邪。取書焚之。妙人自是。德裕宗閔。各分朋黨。更相傾軋。垂四十年。李逢吉用事時。所親厚及附麗者甚衆。時人目爲八關十六子焉。逢吉去而後。德裕進。德裕討澤潞及回鶻。計畫甚長。遭遇武宗。可謂行其志矣。

郭崇韜

郭崇韜。雁門人。莊宗卽位。拜崇韜樞密使。梁王彥章擊破德勝。唐軍大敗歸。莊宗問計崇韜。崇韜曰。彥章圍我。意在取鄆州耳。臣願得兵數千。據下流。築壘於必爭之地。以應鄆州爲名。彥章必來爭。既分其兵。乃可圖也。然板築之功難卒就。陛下宜以精兵挑戰。使彥章兵不得來。十日壘成矣。莊宗以爲然。乃遣崇韜將數千人夜行。所過驅掠居人毀屋伐木。渡河築壘於博州東。晝夜督役。果六日而壘成。彥章引兵到。莊宗迎擊大破之。是時唐已失德勝。梁兵日掠潭相。黎陽。衛州。而李繼韜以澤潞叛入於梁。契丹復犯幽涿。諸將皆曰。唐得鄆州。隔河難守。不若棄鄆與梁。而西取衛州。黎陽。以河爲界。與梁約。罷兵毋相攻。莊宗不悅。退臥帳中。召崇韜問計。崇韜曰。陛下興兵仗義。將士疲戰。爭生民苦轉餉者十餘年矣。況今大號已建。自河以北。人皆引首以望成功。今得鄆州。不能守而棄之。雖欲指河爲界。誰爲陛下守邪。願陛下分兵守魏。而自鄆州疾驅擣其巢穴。不出半月。天下定矣。莊宗大喜。因問司天。司天言歲不利。崇韜曰。古者命將。鑿凶門而出。況成算已決。區區常談。何足信也。莊宗遂卽日下令軍中。歸其家屬於魏。夜渡楊劉。從鄆州入襲汴州。八日而滅梁。莊宗推功。賜崇韜鐵券。崇韜未嘗居戰陣。徒以謀議。居佐命第一之功。位兼將相。遇事無所迴避。而宦官伶人用事者。甚不便之。崇韜頗懼。語其故人子弟曰。吾佐天子取天下。今大功已就。而羣小交興。吾欲避之。歸守鎮陽可乎。下策。故人子弟皆對曰。俚語曰。騎虎者勢不得下。今公權位已隆。而下多怨嫉。一失其勢。何能自安。崇韜曰。然則奈何。對曰。今中宮未立。無策。而劉氏有寵。宜請立劉氏爲皇后。而多建天下利害。以便民者。然後退而乞身。天子以公有大功而無過。必不聽公去。是外有避權之名。而內有中宮之助。又爲天下所悅。雖有讒間。不可動矣。崇韜以爲然。乃上書請立劉氏爲皇后。崇韜素廉。自從入洛。始受四方賂遺。故人子弟或以爲言。崇韜曰。吾位兼將相。祿賜巨萬。豈少此耶。今藩鎮諸侯。多梁舊將。皆主上

斬祛射鉤之人也。今一切拒之。能無反側。明年。天子有事南郊。崇韜乃悉獻其所藏。以佐賞給。莊宗已郊。遂立劉氏爲皇后。同光三年夏。霖雨不止。莊宗思得高樓避暑。乃遣宮苑使王允平營之。左右皆曰。郭崇韜眉頭不伸。嘗爲租庸惜財。陛下雖欲改作。其可得乎。莊宗乃使人問崇韜曰。昔吾與梁對壘於河上。雖祁寒盛暑。被甲跨馬。不以爲勞。今居深宮。蔭廣廈。反不勝其熱。何也。崇韜對曰。陛下昔以天下爲心。今以一身爲意。艱難逸豫。爲慮不同。願陛下無忘創業之難。常如河上。則可使煩暑坐變清涼矣。道理可厭莊宗默然不悅。卒遣允平起樓。崇韜果切諫。左右因譖之曰。崇韜之第。無異皇居。安知陛下之熱。由是讒間愈入。明年征蜀。議擇大將。時明宗爲總管當行。而崇韜恐以讒見危。思立大功。爲自安之計。愈差乃請以親王爲元帥。率師討之。莊宗乃以繼岌爲西南面行營都統。崇韜爲招討使。率大軍入蜀。蜀平。崇韜語繼岌曰。王有破蜀大功。師旋必爲太子。俟主上萬歲後。當盡去宦官。繼岌監軍李從襲等聞之。咸切齒此言。莊宗聞蜀破。遣宦官向延嗣勞軍。崇韜又不郊迎。錯延嗣發怒因與從襲等共搆之。延嗣歸讒之。劉后后泣訴於帝。莊宗大怒。及孟知祥爲西川節度使。將行。帝令誅崇韜。并其子廷悔。廷信。崇韜有五子。其二從死。餘皆見殺。崇韜自以爲子儀之後。其伐蜀也。過子儀墓。下馬號慟而去。聞者頗以爲笑。然崇韜盡忠國家。有大略。其已破蜀。因遣使者以唐威德風諭南詔諸蠻。欲因以綏來之。其不幸被讒以死。信矣哉。盈滿之難居也。利令智昏。貪令人愚也。

藏書卷十四名臣傳

一 經世名臣

趙普

趙普字則平。太祖卽位。以佐命功。授左諫議大夫。乾德二年。以普爲門下侍郎平章事。命薛居正、呂餘慶參知政事。以副之。參政班在宰相後。不宣制。不知印。不預奏事。不押班。但奉行制書而已。蓋欲以寵普也。太祖數微行幸普家。普每退朝不敢便衣冠。一日大雪。向夜。普意帝不出。久之。聞扣門聲。普亟出。帝已立風雪中。普惶懼迎拜。設重裀地坐。堂中熾炭燒肉。普妻行酒。帝以嫂呼之。因與計下太原。普曰。太原當西北二面。太原下。則邊患我獨當之。是不如姑俟。削平諸國。則彈丸黑子之地。將安逃乎。開寶六年。復幸普家。會錢王俶獻海物十瓶。普置廡下。未屏。帝至。顧問何物。普以實對。帝曰。海物必佳。命啓之。皆瓜子金也。普惶恐謝。帝曰。受之無妨。彼謂國家事。皆由汝書生耳。普爲政久。頗專。屯田員外郎雷得驤判大理寺。其官屬與堂吏附會。普擅增減刑名。得驤憤惋。求見上奏之。并言趙普強市人第宅。多聚賄。蕭相國故智上怒叱之曰。鼎鑪猶有耳。汝不聞趙普吾之社稷臣乎。引柱斧擊折其上齟二齒。命左右曳出。將斬之。旣而上怒少霽。乃黜爲商州司戶參軍。後又削籍徙靈武。時官禁私販秦隴大木。普遣親吏詣市屋材。吏竊貨大木。冒稱普市。貨鬻都下。權三司使趙玘廉得之。普又以隙地私易尙食蔬圃。又營邸店。規利。盧多遜爲翰林學士。因召對。屢攻普短。會得驤子有鄰擊登聞鼓。訟堂後官胡贊。李可度受賕。執法事普庇之。太祖大怒。下御史府按問。悉抵罪。而以有鄰爲秘書省正字。普恩益替。始詔參知政事。與普更知印。押

班奏事以分其權。未幾出普爲河陽節度。太平興國初入朝。遷太子太保。時盧多遜爲相。專譖毀普。謂普初無立上意。以故普奉朝請者數年。會柴禹錫等告秦王廷美驕恣。將有陰謀。上召問普。普言願備樞軸以察奸變。奸惡退又上書自陳。預聞太祖昭憲皇太后顧託之事。太宗感悟。卽召見慰諭。拜司徒兼侍中。并以子承煦爲六宅使。淳化三年卒。年七十一。諡忠獻。上撰神道碑銘。親八分書以賜之。二女皆笄。咸願爲尼。上不能奪。賜長女名志願。號智果大師。次女名志英。號智圓大師。普初得志。屢以微時所不足者爲言。太祖曰。若塵埃中可識天子宰相。則人皆物色之矣。太祖嘗勸普讀書。普後每歸私第。闔戶啓篋讀書。竟日。既薨。家人發篋視之。則論語二十篇也。性深沉。有岸谷。雖多忌刻。而能以天下事爲己任。嘗奏薦某人。太祖不用。明日復奏。又不用。明日又以其人奏。太祖怒。碎裂奏牘擲地。普跪而拾之。他日補綴舊紙。復奏如初。又有羣臣當遷官。太祖惡其人不與。普堅以爲請。太祖怒曰。朕固不與。卿若之何。普曰。刑以懲惡。賞以酬功。且刑賞天下之刑賞。陛下豈得以喜怒專之。太祖怒甚。遽起。普亦隨之。太祖入宮。普立于宮門外。竟得俞允乃退。一日大宴。雨驟。上已不悅。雨又不止。左右皆恐。普因奏言。外間百姓正望雨。時雨難得。可令樂官就雨中奏樂。上大悅。乃終宴焉。太宗時曹彬爲弭德超所讒。屬普再相。爲彬辨雪。保證。事狀明白。太宗嘆曰。朕聽斷不明。幾誤國事。卽日竄逐德超。遇彬如舊。初昭憲太后遺命。太祖傳位太宗。意欲傳之廷美。以及德昭。故太宗卽位之初。命廷美以開封。而德昭、德恭等皆稱皇子。及德昭不得其死。德芳相繼夭歿。廷美始不自安。他日太宗以傳國意訪之普。普對曰。太祖已誤。陛下豈容再誤。當太祖時。普鎮河陽。時普曾有表自慙云。外人謂臣輕議。皇弟開封尹。皇弟忠孝全德。豈有間然。矧昭憲皇太后大漸之際。臣實預聞顧命。知臣者君。願賜昭鑒。太祖卽手封其書。藏之宮中。至是普復密奏。太宗乃于宮中訪得之。因感悟。復進用普。普遂廉得盧多遜交通秦王事。太宗怒。下多遜御史獄。命翰林承旨李昉等親治之。獄上。削奪多遜官爵。流崖州。廷美勒歸私第。普又以廷美居西京非便。諷知開封府李符。上言廷美不悔過而怨望。乞徙遠郡以防他變。詔降

封廷美爲涪陵縣公。房州安置。以閻彥進知房州。袁廓通判州事。以伺察之。雍熙元年。廷美年三十八。憂悸成疾卒。廷美之得罪。趙普爲之也。廷美亦可謂不知早回頭者矣。此吳季子所以爲難歟。初太祖謂普曰。天下自唐季以來。數十年間。帝王凡易十姓。兵革不息。其故何也。普曰。其故非他。節鎮太重。君弱臣強而已。今所以治之。無他奇巧。惟稍奪其權。制其錢穀。收其精兵。則天下自安矣。語未畢。上曰。卿勿言。吾旣諭矣。頃之上與故人石守信。王審琦等。飲酒酣。屏左右。謂曰。我非爾曹之力。不得至此。念汝之德。無有窮已。然爲天子。亦大艱難。殊不若爲節度使之樂。吾今終夕未嘗安枕而臥也。守信等皆曰。何故。上曰。是不難知。居此位者。誰不欲爲之。守信等乃皆惶恐頓首曰。陛下何爲出此言。上曰。不然。汝曹雖無心。其如麾下之人欲富貴何。一旦以黃袍加汝身。雖欲不爲。不可得也。守信等乃皆頓首涕泣曰。臣等愚不及此。惟陛下哀憐。指示可生之塗。上曰。人生如白駒過隙。所爲好富貴者。不過欲多積金錢。厚自娛樂。使子孫無貧乏耳。汝曹何不釋去兵權。擇便好田宅市之。爲子孫立永久之業。多置歌兒舞女。日飲酒相歡。以終其天年。君臣之間。兩無猜嫌。不亦善乎。皆再拜謝曰。陛下念臣及此。所謂生死而肉骨也。明日皆稱疾。請解軍權。上許之。皆以散官就第。乃設通判于諸州。凡軍民之政。皆統治之。事得專達。與長吏均禮。大州或置二員。又令節鎮所領支郡。皆直隸京師。得自奏事。不屬諸藩。於是節度使之權始輕。乾德三年。置諸路轉運使。自唐以來。藩鎮屯重兵。租稅所入。皆以自贍。名曰送使留州。其上供者甚少。普乞命諸州度支經費外。凡金帛輸送汴都。無得專留。每藩鎮帥缺。卽令文臣權知。所在場務。置轉運使掌之。雖節度防禦團練觀察使及刺史。皆不預僉書金穀之籍。于是財利盡歸于上矣。殿前侍衛二司。各閱所掌兵。揀其驍勇者。升爲上軍。而命諸州長吏。選所部內兵。凡材用伎藝有過人者。悉送都下。以補禁旅之闕。又分遣禁旅戍守邊城。立更戍法。使往來道路以習勤苦。均勞逸。自是將不得專其兵。而士卒不致於驕惰。皆普之謀也。普初與太祖相遇。其事甚奇。蓋當周世宗親征淮南。駐蹕正陽。拒壽陽劉仁贍。時太祖分兵滁州。距壽州只四程。南唐主李璟聞世宗在淮。命

大將皇甫暉提兵十萬。控扼滁陽。以援壽州。太祖與暉遇於清流之關。大爲暉所敗。是夜暉整全師入憩滁陽。太祖兵聚清流。慮暉兵再至。問諸村人。云有鎮州趙學究。在村中教學。多智計。村民有爭訟者。多詣以決曲直。太祖乃微服往訪之。學究曰。皇甫威名冠東南。太尉自諒與己如何。曰。非敵也。學究曰。今兩軍勝負如何。曰。彼方勝而我敗。所以問計於君耳。學究曰。然使彼來日整兵出戰。師絕歸路。不復有噍類矣。太祖曰。當奈何。學究曰。我有一計。可以因敗爲勝。今關背有徑路。人無行者。雖牌軍亦不知也。可以直抵城下。方西澗水大漲之時。彼必謂旣敗之餘。無敢躡其後者。誠能由山背小路。率兵浮西澗。徑至城下。彼方解甲休衆。不爲備。斬關而入。可以得志矣。太祖大喜。卽下令誓師。夜出跨馬。浮西澗以迫城。暉果不爲備。奪門以入。擒之。遂下滁州。蓋淮南無山。惟滁州邊淮。有高山爲屏蔽。旣失滁州。不惟中斷壽州失援。而淮南盡爲平地。世宗乘破竹之勢。盡收淮南。李璟割地稱臣。皆由太祖先擒皇甫暉。首得滁州阻固之地故也。趙學究卽韓王普。

張齊賢

張齊賢。曹州人也。慕唐李大亮之爲人。故字師亮。太祖幸西都。齊賢以布衣獻策馬前。內四說稱旨。齊賢堅執以爲皆善。上怒。令武士拽出之。及還。語太宗曰。我幸西都。唯得一張齊賢。異時可使輔汝爲相也。或曰。太祖有意取河東。恐謀洩。故置齊賢下。并汾策不用。太宗擢進士。欲置齊賢高第。有司偶失掄選。上不悅。故一榜盡與京官。車駕北征。議者皆言宜速取幽薊。齊賢上疏曰。聖人舉事。動在萬全。百戰百勝。不若不戰而勝。若動之慎之。則契丹不足吞。燕薊不足取。自古疆場之難。非盡由敵國。亦多邊吏擾而致之。透甚。若緣邊諸砦。撫禦得人。但使峻壘深溝。畜力養銳。以逸自處。寧我制人。則邊鄙寧。邊鄙寧則輦運減。河北之民獲休息矣。臣聞家六合者。以天下爲心。是故聖人先本而後末。安內以養外。人民本也。疆土末也。五帝三王。未有不先根本者也。六年爲江南西路轉運。

使齊賢居使職。行寬大江左人思之。召還簽書樞密院事。雍熙三年大舉北伐。代州楊業戰沒。上訪近臣。齊賢請行。先是齊賢言事頗忤上意。上因授齊賢給事中。知代州。與部署潘美同領緣邊兵馬。是時遼兵自湖谷入寇。薄城下。都校馬正以所部列南門外。衆寡不敵。副部署盧漢賓畏懦。保壁自固。齊賢選廂軍二千出正之右。誓衆慷慨。一以當百。遼兵遂却。初齊賢約潘美會戰。無何。間使爲遼人所得。齊賢以師期既漏。恐美衆爲遼所乘。既而美使至。云師出并州。至北井得密詔。東師敗績于君子館。并之全軍不許出戰。已還州矣。齊賢乃閉其使密室中。夜發二百人。人持一幟。負一束芻。距州城西南三十里。列幟然。芻遼兵遙見。光中有旗幟。意謂并師至矣。駭而北走。齊賢先伏步兵二千於土磴砦。掩擊大敗之。擒其北大王之子一人。帳前舍利一人。斬數百級。獲馬二千。器甲甚衆。捷奏反歸功於盧漢賓。大人心事遼人。又自大石路南侵。齊賢預簡廂兵千人爲二部分屯繁峙。崞縣。下令曰。代西有寇。則崞縣之師應之。代東有寇。則繁峙之師應之。比接戰。則郡兵集矣。至是果爲繁峙兵所敗。淳化二年。趙普薦齊賢可大用。召入參知政事。數月拜平章事。王延德掌京庖。欲求補外。託參政李沆爲請于齊賢。齊賢以聞。太宗以延德嘗事晉邸。怒其不自陳而干執政。於是罷齊賢爲尙書左丞。出知定州。至真宗即位。乃召拜兵部尙書。平章事。初齊賢從容爲上言皇王之道。而推本其所以然。上曰。朕以爲皇王之道非有迹。但庶事適治道。則近之矣。時戚里有分財不均者。更相訟。齊賢曰。是非臺府所能決。臣請自治之。齊賢坐相府。召訟者問曰。汝非以彼分財多。汝所分少乎。曰然。命具款。乃召兩吏。令甲家入乙舍。乙家入甲舍。貨財無得動。分書則交易。明日奏聞。上大悅。曰。朕固知非君莫能定也。齊賢自負有致君之術。每敷奏多不直致。日南至。朝羣臣。會齊賢被酒。上曰。卿爲大臣。何以率下。乃罷守本官。李繼遷陷清遠軍。命爲涇原等州軍安撫。經略使齊賢上言。自清遠軍陷沒。青岡砦燒棄。靈武一郡。援隔勢孤。今其蕃部大族首領素與繼遷有隙者。若能啗以官爵。誘以貨利。結以恩信。而又激之以利害。則山西之蕃部族帳。自然傾心朝廷。今靈武軍民不翅六七萬。皆陷在危亡之地。使繼遷來春發兵攻圍。